

遵聞錄
存是錄
東江始末
存漢錄



存

漢

錄

高斗樞撰

中華書局

存漢錄

鄧高斗樞撰

崇禎丙子。予以湖廣副臬。備兵長沙。庚辰。晉右參政。辛巳六月。聞報晉臬長。移守下荆南。駐鄖陽。鄖故流賊出沒已十年矣。先是庚辰春。閣部楊公既敗張獻忠。獲其妻妾。及軍師潘獨鰲。不卽殺而貢之。襄陽獄中。獻賊入蜀。李自成。羅汝才。及老猢猻。革里眼。諸賊繼之。蜀撫邵公捷。奉力不能拒。致被逮。閣部統諸部兵。追至蜀中。戰守逾年。賊勢愈熾。至辛巳正月。賊復奔楚。閣部迎戰於楚蜀之交。兵大潰。獻賊遂從歸州取間道疾馳至襄。襄有防守兵數百。賊啖以利。反爲賊用。二月初三日夜半。城中四面火起。官兵俱不知所繇。已而道臣張君克儉。及郡邑各官俱被殺。襄王亦遇害。皆防守官兵所爲也。次蚤天明。獻賊至。各兵迎之以入。遂取其妻妾及潘獨鰲以去。報聞。天子大怒。爲逮撫臣袁公繼咸。然袁公先奉閣部檄駐竹山。去襄千里。實非其咎。鄖道萬君言策。亦被黜。於是以右參政王公永祚。晉鄖撫。予遷鄖道。而襄道則調參議。冒君起宗云。

予以七月初六日長沙解纜至荆。而臥疾數日。月盡達襄陽。城中一片焦土。向來塵市。止存頽垣敗壁。居民十無二三。皆葺草以居。官署僅有新葺數間。徘徊信宿。啓行入鄖。則八月初六日矣。鄖城四圍僅六里。又半爲甌脫。居民不滿四千。外六屬俱爲賊破。每年四五次蹂躪。惟郡城獨全。然城外關廂俱燬。無一居

民田疇俱爲蓬蒿數百里如一。惟近城之田則城中人耕種以餬口。是年蝗飛蔽天野無寸草也。七月間獻賊復繇鄖入秦督師丁公興左鎮尾之而至左兵二三萬一湧入城城中無一家無兵者淫污之狀不可言數日啓行復罄洗其家以去去十餘日而予至米粟俱無可覓士民相見無不痛哭流涕不恨賊而恨兵眞慘極矣大約自荆至襄所經荆門宜城城邑無恙而村落已空然猶有十一二僅存者自襄至鄖則城邑已不堪言而出城竟不見一人村落止存廢阬欲覓一椽一瓦俱不可得矣若鄖之六鵬房縣竹山竹谿上津鄖西保康并城郭俱已平夷城隍俱一片蓬蒿居民僅存者俱覓山之高而上有平岡者結砦以居大縣可三十砦小縣不過十餘砦砦之大者可二百人小者不滿百人各墾砦下之田以自給縣令至者亦居砦上征輸久停民貧無訟胥役盡逃令與民大率並耕而食不復能至郡參謁矣

余以初八日履任至十三日忽接猛將軍如虎檄報獻賊復東來立可至鄖是時鄖兵俱發往北路蓋因賊旣西入秦倘秦兵嚴守必折而從北也不意仍從西來須臾猛將軍至兵僅百許次蚤獻賊至予率堞夫登陴固守賊亦不知城內無兵而又盧督師在後竟引而東而城中士民復大恐謂左兵當復經此也余卽遣役往迎督師且懇其兵無入城督師答書已許不入城而托予於城外覓數間小房欲暫住以登疏余先以督師書傳示士民人心始定明日督師至駐一關帝廟湫隘殊甚又十日始東左鎮意殊不憚以沮其入城也猛將軍係虜中降將驍勇善鬪是年冬戰死於南陽城上

鄖城舊爲治院所駐是時澄川王公移鎮於襄而鄖中共事者守徐君起元倅陳君萬家李則朱君翊辦

也。營將則房竹營游擊李茂春。兵一千五百。均陽營游擊胡廷聘。兵五百。守均。其留郢者一千。而治標左營百總楊明起。余啓凡。各兵三百許人。游擊王光恩。兵可三百許。則降丁也。余因周視郢地。東與北俱山麓。而西與南俱江漢。賊善騎而不習舟楫。余謂戰地必在東與北。漢水西北來。離城僅丈許。行半里。遇一小山。名曰西壇。遂折而西。繞西壇之外。復折而南。沿至東南城下。離城亦止丈許。予乃於西北及東南兩隘。各繕一樓。一面倚山。一面倚城。一面倚漢水。各甃以磚。樓上多設銃礮。樓下開一門以通出入。李茂春之兵。卽營於東南樓之內。沿南城外而居。西壇高出於城丈許。不可無兵。而山頂頗平。量可容兵數百名。則令楊明起居焉。西壇之下。地平如掌。當城之西南。則王光恩居焉。城東亦有二培樓。一曰四鋪幫。一曰青龍寺。離城甚偏。余令余啓凡居四鋪幫。分均陽營兵三百名居青龍寺。其均陽餘兵。則居城中。備城守及他調發之用。均陽兵皆郢城人。與郢民俱親族。在各營中獨守法。故留之城中。其城北素無濠城。東雖有濠而淺。地勢陡峻。不能蓄水。余令東北離城丈許。各築土牆。高八尺。每堵留一銃眼。凡閱三月。而四城防守之事俱備。其一切築牆造樓。及葺蓋兵房。皆用各營兵而不煩一民云。

辛巳之冬。壬午之春。郢城幸無賊警。夏間忽接陝西興安道檄。稱川北有賊名搖天動。先時同羣賊入蜀。厥後各賊東走。而此賊遂獨留川北。今將從興安趨竹山。以及郢襄。約有萬餘。予令房竹營千總漆尙友。均陽營千總高萬錦。并楊明起。合兵禦之。賊聞竹山有備。邊延不敢入境。仍歸川北。至九月間。王光恩來云。有弟光興在搖天動內。有衆數百。情甘投順。余未之許。而光恩請愈懇。余令光恩招之至。汰其老弱者。

得精壯百五十人。卽隸光恩營。尤興改名光泰。後李賊犯郛。光泰戰甚力。

先是張李各賊。每陷一城。輒大掠以去。至壬午夏秋。李自成羅汝才。每得一城。輒分賊防守。且嚴禁搶掠。以籠民心。時已得中州數郡。將取襄郛。而左大將軍自開封潰後。久住樊城。全無赴賊之志。治臺王公澄川。亦留左於樊。以衛襄。謂大兵在賊必不至也。及自成汝才由汝甯趨襄。左聞風先遁。至荊州。又念荆以江爲界。無路可逸。又改往武昌。而賊遂長驅抵樊。徘徊數日。以大礮擊襄之北城。襄人大恐。一時文武。先取其家屬登舟矣。賊復西去七十里。至白馬灘渡江。王公澄川竟護福清王東下。賊遂入襄。時十二月初三日也。初八賊分股攻均州。時降丁惠登相在焉。登相隸左大將軍。而分居於均。素獷悍難馴。不屬郛節制。至是斂兵登武當。依險自完。賊遂入均。守將高萬錦自溺漢江以死。十二日賊抵郛城。子率各營戰於城外。時王光恩、光泰、楊明起、余啓凡戰甚力。賊攻四鋪。背龍寺晝夜不息。啓凡等以火罐擲之。焚死者相踵而攻不止。然終不能登。賊又分股直抵北城。子於土牆內先伏鳥鎗手擊之。百發百中。賊不能近。至十五日賊始退。是月荊州承天相繼俱陷。

方賊繇白馬灘渡江。郛襄路斷。故郛中久不知襄陷也。及攻郛而退兵追之。獲賊五十餘人。始言襄陽情形。李茂春素懼怯。始有懼色。且謂治院已東去。郛兵月餉將安出。而惠登相在武當。害貽茂春。勸其遠避。否則賊再來必不支。茂春遂於十七日夜拔營西去。余親往留之。竟不能得。次日茂春將抵金漆嶺。會參將徐勇先率治臺檄守漳。茂春不能過。而營內船少。各兵多步行。兵婦無不嗟怨。又四鄉無一民居。無所

得食。於是茂春大窘。復統其兵來歸。余下令各營。謂茂春罪在不赦。而裨將及各兵。則不妨招之入營。茂春必須生擒議罪。於是王光恩、楊明起、余啓凡、各招房竹營兵盡降。而茂春就擒。余縛送徐參將。令其羈於營內。以候請旨。後勇亦去金漆涼。至興安。茂春隨之以去。又數月。茂春病死。光恩等三人既分招房竹營兵。又各有召募三營之兵。各盈千。而高萬錦死。後其兵亦歸。仍入均陽營。於是鄖兵有四千云。癸未春。李自成與羅汝才同駐襄陽。時已據襄、荆、承、天、德、安。並汝甯、南陽、河南。開封諸郡矣。自成志圖僭位。欲先吞并各賊。時獻賊在安廬、黃州一帶。自成每與書檄。皆用上司臨屬吏體。獻賊大怒。然畏自成之強。不敢與較。亦不敢復與自成合營矣。老獍、革里眼、各股自成以計除其魁帥。並將其衆。惟汝才勢力相敵。自成潛欲除之。忽於三月初六夜。自統精賊百餘。直至其營。排闥而入。斬汝才於臥榻之上。汝才部下初多不服。自成百計籠絡。半月始定。於是中原無爲難者。一憑自成所爲矣。

惠登相在武當。自成屢招之。登相見誅鋤同輩。懼而不往。自成大怒。令賊劉某統兵三萬。往擒登相。隨攻鄖城。登相聞之。逃往興安。賊追之不及。遂於白河一帶。擄往來之船。欲從漢江順流犯鄖。余念鄖城外西南爲各營所居。獨倚江漢爲險。若賊得順流而來。各營何以自固。又興安至鄖。船素不多。因急令水哨馬之服領兵船十餘。溯流而上。驅趕民船。將至白河。賊已得船五隻。然船戶已先逃。賊在船中。不能自駕。之服擒船一賊二十人。其四船皆走。履水者二。登岸而逃者二。之服並獲其四空船以歸。賊仍從陸路於均州渡漢而北。竟泊鄖城。時鄖兵止四千有餘。又益以衛兵三百。及民間丁壯二千。以青衿能事者領之。盡

出城搏戰。城上僅留老弱守堞。及均陽營兵二百主礮而已。賊勢甚勇。先用均州靜樂宮門扇約百餘片。列於城東北。以繩網縛如木城。我兵直抵其營。連用火罐擊之。火起。賊走。各兵盡撤其木城以入。次日賊用木梯六十餘條。復抵城下。各營齊出。奮擊殺賊數百。盡奪其梯。賊始退。而營於楊溪鋪。離城十里。予因與各將約曰。賊衆五倍於我。且有馬賊二千餘。我兵出戰。不得遠追。倘賊用馬繞我兵之後。則城與兵不能相顧矣。今後兵出城。以一里爲止。又兵與賊相持。倘賊不能遽退。則城上擊大鑼大聲爲號。兵卽兩邊疾驅。以開銃路。城上大小銃三百一齊俱發。則未有不傷者。如又不退而近土牆。則牆內烏鎗齊發。又佐以城上之礮。必無能爲也。自三月杪至四月初。賊傷死甚衆。忽一夜城上哨者見二十餘丈外。賊暗中往來。徹夜不休。不審其所爲。至曉視之。則已築臺十許座矣。其臺用土一層。卽用麥一層。平鋪之。層累而上。高與城等。每臺長二丈。闊丈餘。仍用磚石砌堞。其上架銃擊城。凡三夜。成臺三十六座。徧於城之東北二面矣。又十餘日。余料臺上之賊久而必倦。約各營及民兵盡出攻臺。民之老弱者盡攜鋤鉞以隨。攻破一臺。輒鋤平之。並攜其麥以歸。自辰至午。已鋤廿二臺。予料各兵饑倦。卽令歸營。次日休息。又次日復出兵。盡夷其臺。賊大窘。復退至楊溪鋪。然尙無去志也。先是治臺標下游擊劉調元。當襄陽陷時。統衆入山。素欲居鄖。而苦鄖無糧。至是余遣人邀調元。予亦發兵千許往援。賊大敗。調元始得至鄖。時五月初一日也。予以調元遠來。應休息一日。初三日黎明。當盡發城內官兵。往楊溪鋪撲賊。至初二午。遙見賊營火起。如欲遁狀。而大雨適至。復不果去。初三日。予起發兵。則賊已遁矣。賊之攻鄖。先後凡四次。而最勇者惟此役。

官民各兵無不捐軀自效者。當四月初。予遣一健兵往陝西。請援於督師孫公。且言旬日以來。殺賊三千。孫公笑曰。爾鄖陽殺賊已盈萬。而止報三千何也。去兵不能應。孫公復曰。昨有賊來降。自言攻鄖不破。賊已死一萬。兵應曰。方兵與賊戰時。道府俱在城上。見一賊倒地。卽紀一功。故云三千。至賊傷於陣上。回營而死者。城上亦不能知。故賊云滿萬也。孫公首肯之。隨發中軍高傑統兵援鄖。傑未至而賊已退。鄖之將士自此知賊可禦。城可守。人人自奮。無離心矣。而治標降了苗時化。亦在南漳。因統衆來歸。時化驍勇善戰。鄖兵勢稍振矣。

五月杪。自成聞督師治兵西安。將出關而南。遂至鄖州。忿鄖之堅守。復發衆來攻。予戒嚴以待。數日。賊抵龍門。離鄖八十里。頓而不進。衆不解其故。余曰。此必畏而不來。又迫於自成之命。不敢歸也。今當每日黎明。發五百人營於楊溪之山上。日入而歸。次日復然。又戒之曰。倘賊悉衆而來。爾卽歸鄖。不可輕戰。如是三日而賊遁。遁後。問彼地居民曰。賊甚畏鄖。不敢前。見楊溪山上有兵。卽欲遠去。會五更時。漢江水發。有水石相擊聲。賊於夢中大呼曰。鄖兵至矣。遂亂相殺。或奔或伏。至天明。賊將曰。未見鄖兵。已作此狀。奈何欲攻鄖乎。遂引去。

均州去鄖僅一百二十里。爲賊所據。鄖兵哨探不能踰均而東。六月間。予令王光恩、苗時化、劉調元往攻之。賊聞兵至。輒引去。遂復均州。

督師孫公駐西安。將出關討賊。自成駐鄖州以待之。予請於孫公。謂大兵出關。自成必悉衆迎戰。請以鄖

兵直趨光化。穀城以擣襄陽。乞密示兵期。孫公約以八月上旬。至七月杪。惠登相、徐勇、繇興安直趨均州。奉孫公檄。會鄧兵同攻光化。予謂督師兵未出關。而自成在鄧。離鄧止三百里。鄧兵不宜遠出。且姑待之。登相不聽。與徐勇逕趨穀城。余不得已。先令劉調元、苗時化往。俟自成離鄧。再發兵。八月初。惠、徐、苗、劉竟抵穀城之下。賊不料官兵猝至。倉皇無措。然登相不攜攻城之具。賊欲走而兵已繞城。賊不敢出。城上寂無一人。而兵亦束手不能登。至次日。登相等始得木梯、鋤、鉞等具。而城上垛夫及礮銃矢石排列亦定矣。又數日。襄陽發賊來援。登相與時化迎擊之。斬首數百。擒一百四十餘人。餘賊奔回。然穀城竟堅守不下。調元爲登相所侵侮。遂渡漢水而北。獨抵光化。書諭守賊傅某。遂以城降。至九月初十日。聞督師已出關。自成亦離鄧。予乃發王光泰、楊明起。又分均陽營兵親統往穀。穀堅守如故。予謂必得內應乃可。又旬日。而僞知縣陳知密請降。約以次早兵從西南角登城。城遂破。各賊或斬或奔。城內居民先爲獻賊所屠。不滿二百人。登相復肆擄掠。余力禁乃止。又次日。而督師敗報至。

督師出關。自成率賊於襄陽、郟縣之間待之。由陝至郟。凡郡邑城俱不置守具。督師至一城輒入。迨至襄郟間。去關已遠。糧運艱。而自成守不戰。分賊萬餘。遶出督師之後。餉道遂絕。督師大驚。總兵白廣恩先降於賊。餘兵遂潰云。

督師敗報至穀城。諸將皆色沮。而登相徐勇更甚。予亦未審自成行止。未便攻襄。而穀離鄧遠。遂旋師入均。以探自成消息。又一月。知自成已入關。且至西安。又遣賊來襲。盡護其妻妾以北。予始統各營攻襄。登

相與勇竟不行。襄賊爲李之綱、路應標、楊彥昌、聞兵至，開門出戰。苗時化、王光泰奮擊大破之，斬賊二百餘。賊奔入城。城既高而北臨漢江，東西南三面皆濠，深廣難渡。賊又恐，郢兵用舟順流而下，乃於漢江當城之西北處，以大船填巨石，沈於江底。自南至北橫截江流，予令各營於三更時多負小舟，至東南一帶渡濠泊城，而城外亦有短牆。時連時斷，賊初藏於牆內，見有小舟開渡，齊出牆外，銃箭齊發，舟不能近。予誘賊出戰，而賊終不出，予欲坐困之。而郢守徐郢理朱各以牘來，謂自成已破西安，徇地至漢中，並高雒一帶俱爲賊有。賊已近郢，而兵乃遠出，乞加審察。予然其言，遂於臘月望日收兵歸郢，而勇與登相各率所部取道襄陽之北界疾馳而東，奔至武昌，投左鎮矣。左駐武昌，擁重兵，糜重餉，而逍遙竟歲，使孫公出關討賊。時左亦從郢入襄，而俾自成腹背受敵，則必不能猖獗若此也。

甲申春，自成已據全秦，將北犯京師，而恨郢之攻襄也，復發賊三萬，令路應標、馮養珠等統之以攻郢。郢時有胡廷聘、劉調元、王光恩、苗時化、楊明起、余啓凡六營，兵力未減於前，但自崇禎六年流寇渡黃河而南，無歲不擾郢襄，遂奉旨停征，餉無可措，帑藏如洗。癸未四五月，賊圍城，城外二麥俱無收，稻亦不及栽。入冬至春，郢城大饑，營中兵將各從漢江湖舟，自房竹買雜糧以自給。其貧者采食草樹根葉，遇賊傳城，兵民齊奮。大概如癸未四五月，然賊結營楊溪鋪，每三四日一至城下，不至如前次之勢猛矣。予探賊糧運頗艱，各處徵集雜糧運至均州，復自均餉攻郢之兵，亦有不繼之時。予與各營議曰：賊倚均爲窟穴，均城之賊謂郢自守不給，必不備我兵之往襲。吾間道襲均，殺其魁帥，燒其積聚，亦退賊之一策也。遂發兵

千餘。楊明起令之。日入時渡漢江。從南岸往均。黎明而至均。賊果不爲備。各兵奮勇入城。逢人便斫。復燒其聚糧之所而還。賊不知兵何從至。報至郢城下。城下之賊遂退三十里。欲與均稍近也。復數日。以糧不繼而去。自正月二十至三月盡云。

當應標之攻郢也。時郢四面千里。悉屬賊境。斗絕孤城。屹立其中。欲破賊解圍。殊成妄想。予已絕重生之望。所以勉勵將士者。亦無以爲言矣。賊遣人至城下招光恩。或曰爲光恩所素善者。光恩雖未之許。意不能無動。次日。予真酒城樓。會諸文武曰。今日與諸君痛飲。以盡數年重圍中共相扶救之情。從此與諸君訣矣。守此空城。殊無了期。徒苦將士忍飢裹創耳。今願諸君斬吾首赴賊。各自爲計可也。朱司李曰。吾宗臣請先公死。光恩勃然曰。公之言蓋爲光恩也。光恩雖不肖。豈忍負公。會招者復至城下。光恩射殺之。衆志復堅。蓋予原實語。非徒以激光恩。今日投老故山。回首當年情景。庶邀彼蒼一鑒也。

自壬午冬襄陽陷後。朝廷用李公乾德爲郢撫。復用郭公景昌。俱以路絕不能入郢。有訛傳郢城久陷者。遂真郢撫不復推矣。至癸未六月。予具疏請兵。於是京師知郢尚在。復議郢撫。廷議皆謬。及於予。會揆路有憎予者持之。此時郢城萬死一生。尙視爲美轉也。於是以前守徐君爲郢撫。而加予太僕少卿。司李朱君加僉事。路阻不通。至甲申四月。有郢城舊弁師干城。自京師伏行歸郢。具言其狀。於是徐君蒞郢撫任。予以疾遷居別置。朱僉事攝道事云。

是年三月間。予差役往武昌乞援。朱司李亦差役往襄郢。皆賊所據。去役俱破衣行乞以前。至七月。司李

所遣役先歸。得楚撫何公手書。知三月京師已陷。先帝賓天。南都已有新主。於是城中文武俱爲先帝發喪。哭臨如禮。無不盡哀。又數日。予所遣役亦至。始知二月間。予已遷秦撫。蓋自成破西安。廷議欲守漢中。興安以固蜀之門戶。而不知漢興俱久陷矣。次日。襄城路應標復來攻。賊以七月望後至。鄖攻守之狀。大率如前。予雖謝鄖。每日登陴。與諸君協力。賊分馬賊千餘。每日巡於漢江之南。蓋恐鄖兵復襲均也。鄖兵固疲極。而賊艱於運糧。俱欲散去。惟應標不許。衆賊怨恨殊甚。至十二月初七日。天未曙。賊營火大起。則各賊殺應標而星散矣。先是十月間。予遣守備余廷元。南都上疏乞兵。具言鄖兵僅五千。日夜爲賊所攻。不能分以入秦。徐治院朱僉憲亦各差役上疏南都。知萬里狂氛內。尙有鄖陽存也。文武俱陞。敕予加副都。且薦一子。議者謂秦地久陷。秦撫無路可往。又改予撫楚。不知鄖之無路入楚省。猶之秦也。後楚撫改推。而予奉旨回京。另用云。

甲申之冬。自成已敗歸西安。分賊守黃河。以阻清兵之入。又加城濬濠。日夜不休。至乙酉正月。清兵渡河至。自成卽日盡率其賊衆男女。由宛至襄。念中州諸郡不能復顧。而承德荆三郡外已無餘地。於是留婦女輜重於襄。自統衆賊將從承天東下。聞左帥在武昌。有舟師在漢口。賊素不能水戰。遂改路繇荊渡江。取道石首。渡洞庭湖口至岳州。繞出武昌之南。蓋武昌防賊者止在西北。不料其還繞而南也。左帥大驚。卽登舟東下。且拉楚撫何公同行。何公以計脫。獨身至長沙。而左帥遂至九江。蓋左帥投自成之甚。竟不知自成之敗而南竄也。南都聞左帥至九江。又不知其爲避賊也。而滿朝疑懼。時事若此。眞可痛哭。三月。

清兵抵襄。盡得自成婦女輜重。鄖撫徐遼人也。清兵諸帥亦多遼人。聲氣相叶。遂令王光恩詣襄投順。其餘五營苦戰三年。饑疲日甚。亦少振拔之氣。于遂閉門謝事。率僮僕往沅州躬耕以餬口。而王光恩至襄。見英王。賜銀幣鞍馬。且令徐治院仍撫鄖。光恩則督鄖襄總兵。後遂有朱僉事被殺。劉胡等各帥被擒。事郢城四營。其帥爲胡廷聘。王光恩。楊明起。余啓凡。後益以劉調元。苗時化。自山來歸。遂爲六營。同辦賊初。無嫌怨。自徐太守履鄖。任用王光恩爲中軍。得糾察各營事。以此嫌隙。遂生。五帥切齒光恩。每有怨言。光恩憾之久矣。朱僉憲係山東宗室。剛愎任事。而與人不和。各營亦怨之。清兵入襄。鄖撫投順。僉憲鬱鬱會鄖中。青衿有吳雕龍。藍□□。并吳緒揚等。悉爲僉憲心腹。至是令所善青衿。詭稱從武昌來。傳徐治院已改楚撫。朱僉憲已陞治院。徐不察其僞也。雕龍糾青衿十餘人。請其履任行事。且請徐治院交代。徐所厚惟光恩。時往襄。徐窮甚。遂交代之。朱蒞任。卽選授雕龍等十餘人爲襄陽南陽各郡邑官。且令鑄印。余時在沅州耕種。聞之。呼雕龍謂曰。清兵在襄。而郢城如此舉動。獨不能少待乎。且六營將士無一共事。與十餘書生爲之。脫有緩急。將若之何。雕龍不聽而去。而胡劉等五帥聞光恩見英王獲厚賜。且用爲總兵。不勝心熱。各登舟往襄。光恩聞僉憲事。卽白之英王。並言胡劉等五帥皆助之。英王大怒。卽令光恩歸鄖。捕朱僉憲。光恩知五帥將至襄。卽從間道歸。不與五帥值。五帥至。英王詰之曰。朱某叛。爾五人何以助之。卽令左右牽出盡斬之。五帥痛哭呼冤。乃得釋。遂留五帥於營中。而令各差兵往擒朱僉事。否者各斬無赦。於是五帥各差其中軍擒朱僉事矣。光恩先至。以擒獻。朱僉憲之事。謀之徐治院。令其姑緩。又三日而

五帥所差中軍至鄖。立擒僉憲並雕龍等諸衿。獻英王斬之營前。胡劉等五帥。竟留營中。後羈留北都。不許歸鄖。乙酉丙戌二歲。畝耕種自給。故鄉路絕。丁亥春。先大夫在家。差兩僕來鄖。始知清兵已取浙東。且具聞家難。余遂買舟歸。歸後。聞王光恩以他事械送北京論斬。光泰遂統鄖中各兵。獨據鄖城。盡殺鄖中各官。清兵來攻。屢敗以去。後發京兵數萬來。光泰遂統兵入山。蓋予以三月去鄖。鄖以四月大亂云。

孫守法者。西安人。爲秦中副總兵。自成陷西安。守法率家丁六十人。逃至興安。自成繫其妻子以招之。守法不顧賊破興安。守法逃至蜀界。聞子拜撫秦之命。來鄖見子。居數月。子謂曰。吾兩人皆秦官。而袖手居鄖。無益於事。君統家丁往竹谿平利之界。擇山砦可居者居之。益招兵衆。兼設處芻糧。倘興安有隙可圖。卽遣兵來報。守法遂往。至乙酉正月。清兵入秦。自成東走。守法報云。興安已無固志。可取也。子從鄖撫借苗時化之兵以往。一鼓而入興。數日。清兵南下。子還鄖。竄伏民間。守法遂入漢中深山。結砦以居。後二年。餘聞爲清兵所擒云。朱僉憲殺後。其妻孥不便居鄖。子令其往依守法。守法旣擒。不知所終。陳萬家者。黔人。以一榜授鄖倅。恂恂木訥人也。壬午。攝郡篆。乙酉。郡已歸清。卽移疾辭官。而黔中路未通。出居民廬。一日。過子曰。今日居鄖非宜也。盍往房縣深山乎。余曰。入山吾志。然自成餘賊。紛紛逃竄於楚蜀山中。且姑俟之。萬家竟挈其妻妾往居房縣砦上。月餘。萬家令童僕耕種。自成逃賊數百人。忽至。竟爲所擄。萬家先年署房有惠政。房之士民。各出牛酒往遺賊。求釋萬家。萬家獨身得歸。快快不樂。得疾以卒。又有羅大縉者。陝人。以明經爲竹山邑博士。已攝令。甲申。徵攝鄖郡丞。至乙酉四月。稱疾不出。在署惟酣酒。又一月。來

謂予曰。今日爲誰家之官乎。欲歸而故鄉路澁。今路已可行。惟速歸耳。亦辭官以去。予曰。若陳別駕。羅博士者。狀貌不踰中人。曩戎馬鼎沸時。粥粥無所表見。而出處之際。介然不移。豈以寵利嬰其心哉。悲夫。

詳述秦鄖情形疏附錄

奏爲微臣守鄖四載。謬膺撫秦恩命。謹詳述秦鄖情形。亟懇大兵合剿事。臣一介書生。才識庸淺。自崇禎元年通籍。先繇部屬。洊歷郡守。拔任監司。至崇禎十四年。陞分守下荆南道按察使。十五年冬。逆賊李自成攻破襄陽。荆承相繼淪陷。十二月十二日。各賊乘勝直逼鄖陽。臣統率文武將吏。力戰三晝夜。殺賊千餘。賊始遁去。十六年三月。逆闖復發賊數萬。力攻鄖陽。臣統率各臣。且戰且守。一月有餘。殺賊八百。賊復東遁。六月間。臣委推官朱翊辯。同副將王光恩。苗時化。楊明起。劉調元。胡廷聘。余啓凡等。恢復均州。又復保康。擒僞官芮作聖。八月間。臣親統劉調元。苗時化。游擊劉源潔。韓原餘。張文富。王蜀良。強新。馬之服。李開泰。吳葆和等。恢復光化。又同督師所發副將惠登相。徐勇。進攻穀城。僞官陳知。攜印出降。擒斬賊將郭三益。黃世龍。丁白姜等。九人。襄賊楊彥昌。發賊三千。援穀。登相與時化合營截殺。擒斬殆盡。登相隨奉督師調去。臣再調余啓凡。王光泰。許九德。杜元貴等兵。進攻襄陽。賊楊彥昌。馮養珠。路應標等出城迎敵。臣親自督戰。各營奮勇截殺。各賊大敗。入城自守。臣督諸營四面攻圍。一月有餘。賊勢已窮蹙。適聞闖逆入陝。攻陷漢中。興安。臣恐乘虛襲鄖。只得撤兵西歸。至十七年正月。闖逆從西安發賊萬餘。會合路馮等賊。再來攻鄖。臣又統率文武。力戰五十日。殺賊萬餘。賊又遁去。臣體質孱弱。素多火症。自十五年冬。十七年

春枕戈躍馬。日夜不休。冒暑衝寒。憂勞兼至。怔忡嘔瀉。百病交作。祇緣封疆任重。扶病登陴。至四月間。聞知府徐啓元已陞。鄖撫臣亦叨蒙先帝殊恩。加陞太僕寺少卿。竊喜危軀得人。病臣可說休息。鄖撫亦親見臣困憊之狀。業許解任養病。至七月間。署守道僉事朱翊辯接楚撫書。內稱臣已陞秦撫。托翊辯轉報。臣杜門養病。驚荷聖恩。竊念天下事勢至此。正臣子捐軀報國之秋。安敢不力疾任事。而秦中百二河山。自去冬被賊。勢同破竹。卽鄖陽接界。如商雒興漢。盡皆賊據。欲求一旅之師。爲臣恢復之資。而不可得。至若鄖陽之兵。舊有七千。今二年絕餉。又兼荒旱。飢餓之餘。死亡將半。且闖賊於七月望後。又發路馮各賊攻鄖。鄖撫與道將日夜戰守。賊雖屢挫。而闖逆亦屢增發。各賊來攻。經今三月。尙未離鄖。則欲分鄖兵入秦。勢又未可。止有陝西副總兵孫守法。領兵五十餘人來鄖。臣細加詢訪。據云秦地雖陷。民心尙思朝廷恩德。舊將殘兵。多有逃入山谷。不肯從賊者。臣遂於八月初十日。密差各兵潛往山寨。招呼舊時兵將。又委守法馳至竹谿平利界上。探聽漢興情形。而賊氛密布。差兵迄今未回。臣往鄖圖秦。而鄖圍未解。秦兵未集。外援不至。糧餉久窮。屢欲具疏叩關。孤城之外。四面皆賊。募兵民中能齎奏本從賊中潛行者。久未有人。今多方設計。差官齎奏。伏祈皇上迅發大兵。刻期入秦。臣所招山寨遺兵。倘能湊成一旅。則或繇漢興。或繇商雒。必效犄角之勢也。臣策驚磨鈍。素心不敢自後。而體羸病久。重任實所難勝。且望八衰親嗟子行役。每一念至。臣不欲生。伏懇皇上垂念封疆。放臣歸里。少盡一日菽水之供。另簡材能威望之臣。蚤建澄清之績。臣曷勝虔切之至。臣衙門關防。自舊冬西安失事。不知存亡的信。見今書吏承役。緣道路門